

Ni Pangulong Dieter F. Uchtdorf

Ikaduhang Manuglaygay sa Unang Pangulohan



Ang Kabuhi sang Isa ka Disipulo

Traynta anyos na ang nagligad sa Ghana, isa ka bataon nga estudyante sa kolehiyo nga ang ngalan si Doe nagsulod sa isa ka meetinghouse sang Simbahang sa una nga tion. Ginhagad si Doe sang isa ka abyan nga mag-upod sa iya, kag si Doe interesado nga mahibalo-an kon daw ano ang Simbahang.

Manami gid kaayo kag mainabyanon ang mga tawo didto nga indi sia makapugong sa paghunahuna, "Ano nga klase sang simbahan ini?"

Nakabatyag si Doe sing daku nga pagdayaw nga nagdesisyon sia nga magtuon pa gid parte sa Simbahang kag sa mga tawo sini nga tuman kamalipayon. Apang pagsugod pa lang niya nga himuong ini, ang iya pamilya kag kaab-yanan sa maayo nga tuyos, nagpamalabag sa tagsa niya ka tikang. Naghambal sila sang madamo nga malain nga mga butang parte sa Simbahang kag ginhimo nila ang tanan agud puggan sia.

Apang si Doe nakabaton sang panaksihon.

May pagtuo sia, kag ginhigugma niya ang ebanghelyo nga nagapuno sang iya kabuhi sang kalipay. Kag gani, nagpabunyag sia.

Pagkatapos, nagpaayaw sia sa pagtuon kag pagpangamuyo. Nagpuasa sia kag nagtinguha nga maangkon ang impluwensya sang Balaan nga Espiritu sa iya kabuhi. Bilang resulta, ang panaksihon ni Doe kag ang iya pagtuo nangin mas mabakod kag mas madalom. Sang ulihi,

nagdesisyon sia nga magserbe sang isa ka full-time nga misyon para sa Ginuo.

Pagbalik niya halin sa misyon, nakig-date sia kag nagpaka-sal sa isa ka returned missionary—nga amo mismo ang nagbunyag sa iya mga pila ka tuig ang nagligad—kag sang ulihi ginhugpong sila sa Templo sa Johannesburg South Africa.

Madamo na karon nga tinuig ang nagligad humalin sang naeksperiyensahan ni Doe Kaku ang kalipayan sang ebanghelyo ni Jesucristo. Sa sulod sina nga tinion, ang kabuhi indi tanan kalipayan para sa iya. Nagbatas sia sang iya bahin sang kalisod kag kasakit, lakip na ang pagkamatay sang duha ka mga anak—ang madalom nga kasubo sadtong mga eksperiyensya sa gihapon nagapabug-at sang iya tagipusuon.

Pero sia kag ang iya bana nga si Anthony nagpaninguha sa pagpalapit sa isa kag isa kag sa ila pinalangga nga Amay nga Langitnon nga ila ginahigugma sa ila bug-os nga tagipusuon.

Karon, 30 anyos pagkatapos sia nagpabunyag, si Sister Kaku sang sini lang nagtapos sang isa pa gid ka full-time nga misyon—sa sini nga tion kaupod ang iya bana, nga nangin mission president sa Nigeria.

Ang mga nakakilala kay Sister Kaku nagasiling nga may yara sang pinasahi sa iya. Nagasilak sia. Mabudlay nga indi ka mismo magbatyag sang dugang nga kalipay kon kaupod mo sia.

Ang iya panaksihon pihon: “Nakahibalo ako nga ang Manluluwas nagatamod sa akon bilang Iya anak kag abyan (tan-awa sa Mosias 5:7; Eter 3:14),” siling niya. “Kag nagatuon ako kag nagahimakas sing todo nga mangin Iya man abyan—indi lamang sa akon ginapanghambal kundi man sa akon ginahimo.”

Iya Kita mga Disipulo

Ang istorya ni Sister Kaku pareho man sang iya sang madamo nga iban pa. Naghandum sia nga mahibaloan ang kamatuoran, ginbayaran niya ang bili agud maangkon ang espirituhanon nga kasanag, ginpakita niya ang iya paghigugma sa Dios kag iya isigmatawo, kag sa proseso nakaeksperiensia sia sang mga kabudlayan kag kalisud.

Apang bisan ano pa ang mga sablag, bisan ano pa ang kalisud, nagpadayon sia sa pagsulong nga may pagtuo. Kag pareho lang ka importante, nagpadayon sia nga malipayon. Nakakita sia sang paagi indi lang agud mabatas ang mga kabudlayan sang kabuhi kundi man ang mag-uswag wala sapayan sang mga ini.

Ang iya istorya pareho sa inyo kag sa akon.

Talagsa lang nga mahapos ukon wala sang pagtilaw ang aton pagpanglakaton.

Ang tagsa sa aton may aton nga mga kasakit, aton mga kapaslawan, kag aton mga kalisud.

Mahimo gani kita magbatyag sang pagpanalaw kag kon kaisa pagkapierde.

Apang ang mga nagapangabuhi sang kabuhi sang isa ka disipulo—nga nagapabilin nga tampus kag nagpadayon sa pagsulong nga may pagtuo; nga nagasalig sa Dios kag nagatumuan sang Iya mga kasuguan,¹ nga nagapangabuhi sang ebanghelyo adlaw-adlaw kag oras-oras; nga nagahatag sang Cristohanon nga pag-alagad sa sinang yara sa ila mga palibot, isa ka maayo nga buhat sa tagsa ka tion—amo ina sila nga ang ila magagmay nga mga binuhatan sa masami nagahimo sang daku nga kinalain.

Inang mga mas maayo, mas mapinatawaron, kag mas maluluy-on amo ang mga maluluy-on nga makabaton sang kaluoy.² Inang mga nagahimo sining kalibutan nga mas maayo nga lugar, isa ka maluluy-on kag mapinalang-gaon nga buhat sa tagsa ka tion, kag nagatinguha nga ipangabuhi ang balaan, makalilipay kag mahidaeton nga kabuhi sang isa ka disipulo ni Jesucristo amo ina sila ang makasalapo sang kalipay sa ulihi.

Mahibaloan nila nga ang “gugma sang Dios, nga naga-tugob sa mga tagipusuon sang mga anak sang tawo . . . ini ang labing tilinguhaon labaw sa tanan nga mga butang . . . kag ang labing makalilipay sa kalag.”³

MGA TANDA

1. Tan-awa sa Mosias 4:6
2. Tan-awa sa Mateo 5:7
3. 1 Nefi 11:22-23

PAGTUDLO GIKAN SA SINING MENSAHE

Si Pangulong Uchtdorf nagapanudlo sa aton nga ang dalan sang pagkedisipulo mabudlay apang inang mga nagapangabuhi sang “mahidaeton nga kabuhi sang isa ka disipulo ni Jesucristo amo ina sila ang makasalapo sang kalipay sa ulihi.” Pareho nga si Pangulong Uchtdorf naga-sugid sang istorya ni Doe agud ipakita kon paano ang isa ka matuod nga disipulo ni Cristo makasalapo sang paghidaet kag kalipay sa pihak sang mga pagtilaw sang kabuhi, mahimo ninyo binagbinagon ang pagpa-ambit sang sugilanong halin sa inyo kaugalingon nga kabuhi kon ngaa ginpili ninyo nga sundon si Cristo kag kon paano Niya kamo ginpabakod. Kon ginagiyahan sang Espiritu, ang pagpaambit sang kaugalingon nga mga istorya makapabakod sang inyo mga ginatudloan.

LAMHARON

Kalipay bilang Disipulo ni Jesucristo

Nakaagi bala kamo nga naguba ang inyo adlaw? Ano ang inyo ginhimo agud mangin masadya? Si Pangulong Uchtdorf nakahibalo nga “ang tagsa sa aton may aton nga mga kasakit, aton mga kapaslawan, kag aton mga kalisud. Mahimo gani kita magbatyag sang katalaw kag kon kaisa pagkapierde.”

Ang iya solusyon amo ang magpangabuhi sang iya ginatawag nga “kabuhi sang isa ka disipulo”: “mag-pabilin nga tampus kag magpadayon sa pagsulong nga may pagtuo.” Kon magpadayon kita sa pagsulong nga may pagtuo, makasalig kita sa Dios, makatuman sang iya mga kasugoan, kag makaalagad sa iban—kag makabatyag sang kalipay mientras ginahimo ini tanan! Pareho sang siling ni Pangulong Uchtdorf, “Ang mga nagapangabuhi sang kabuhi sang isa ka disipulo . . . amo ina sila nga ang ila magagmay nga mga binuhatan sa masami nagahimo sing daku nga kinalain.”

Hunahunaa ang paglista sang mga pamaagi nga mapangabuhi mo ang kabuhi sang isa ka disipulo. Halimbawa, mahimo kamo maglista sang isa ka ideya sa pag-alagad pareho sang "Magbulig sa isa ka ginikanan sa paghanda sang panyapon" ukon isa ka ideya sa pagtuman sang mga kasugoan pareho sang "Pagpangamuyo para sa dugang nga pasensya sa akon mga utod." Sa madason nga tion nga makabatyag ka sang pagkapaslaw ukon pagkapierde, kuhaa ang inyo lista-han, magpili sang isa ka ideya kag himoa ini!

© 2017 iya sang Intellectual Reserve, Inc. Tanan nga kinamatarong ginahuptan. Ginbalhag sa Pilipinas. Petsa sang pagtugot sa Ingles: 6/17. Petsa sang pagtugot sa paglubad: 6/17. Paglubad sang *First Presidency Message, August 2017*. Hiligaynon 97928 861

MGA KABATAAN

Malipayon kag Masubo nga mga Tinion

Ang iban nga adlaw may mga indi-gid-tuman-kamalipayon nga mga tinion. Kag OK lang ina. Si Jesus makabulig sa inyo nga malampuwasan ang mga ini.

Magdrowing sang isa ka guya nga nagakusmod. Paano si Jesus makabulig sa inyo kon masubo kamo? Karon, magdrowing sang isa ka guya nga nagayuhum. Paano si Jesus makabulig sa inyo nga mangin malipayon?



Pagkabuhí sang Nakonsagrar nga Kabuhí

Tun-i sing mainampuon ining materyal kag magpangamuyo agud mahibaloan kon ano ang ipaambit. Paano bala ang paghangop sang katuyuan sang Relief Society nagahanda sa mga anak nga babayi sang Dios para sa mga bugay sang kabuhí nga wala'y katapusán?

Ang pagkonsagrar amo ang pagpain ukon pagdedikar sang isa ka butang bilang sagrado kag nahalad para sa balaan nga mga katuyuan,” siling ni Elder D. Todd Christofferson sang Korum sang Napulo’g Duha ka mga Apostoles. “Ang matuod-tuod nga kadalag-an sa kabuhí mabaton sa pagkonsagrar sang aton mga kabuhí—nga amo ang aton panahon kag mga pagpili—sa mga katuyuan sang Dios.”¹

Si Elder Neal A. Maxwell (1926–2004) sang Korum sang Napulo’g Duha ka mga Apostoles nagsiling, “May huyog kita nga tamdon ang pagkonsagrar bilang ang paghalad lamang kon ginapangayo sang Dios, sang aton mga materyal nga pagkabitang. Pero ang pinakamataas nga pagkonsagrar amo ang paghalad sang kaugalingon sa Dios.”²

Sa aton pagkonsagrar sang aton mga kaugalingon sa mga katuyuan sang Dios, ang aton pagtuo kay Jesucristo kag sa Iya Pagpasag-uli

magadugang. Sa aton pagpangabuhí sang kabuhí nga nakonsagrar, mapakabalaan kita paagi sa sinang mga hinimoan.

Si Carole M. Stephens, Unang Manuglaygay sa Pangulohan sang Relief Society nagsiling: “Si Elder Robert D. Hales nagpanudlo, ‘Kon nagahimo kita kag nagatuman sang mga kasugtanan, nagagwa kita sa kalibutan kag nagasulod sa ginharian sang Dios.’

“Ginabag-o kita. Nagaliwat ang aton dagway, kag nagaliwat ang aton pagginawi. Ang mga butang nga aton ginapamatian kag ginabasa kag ginahambil nagaliwat kag ang aton ginasuksok nagaliwat bangod mga anak na kita nga babayi sang Dios nga nahugpong sa Iya paagi sa kasugtanan.”³

Ang pagkonsagrar amo ang kasugtanan nga ginahimo sang Dios “upod sa panimalay sang Israel; sa tapos sadtong mga adlaw, nagasiling ang Ginuo: Ibutang ko ang akon

kasugoan sa sulod nila, kag isulat ko ini sa ila tagipusuon; kag ako mangin ila Dios, kag sila mangin-akon katawhan” (Jeremias 31:33). Ang pagpangabuhí sang nakonsagrar nga kabuhí kabagay sa plano sang Dios para sa aton.

Dugang nga Balaan nga mga Kasulatan

1 Mga Taga-Tesalonica 1:3; tanawa sa Doctrine and Covenants 105:5; reliefsociety.lds.org

MGA TANDA

1. D. Todd Christofferson, “Reflections on a Consecrated Life,” *Liahona*, Nob. 2010, 16.
2. Neal A. Maxwell, “Consecrate Thy Performance,” *Liahona*, Hulyo 2002, 39.
3. Carole M. Stephens, “Wide Awake to our Duties,” *Liahona*, Nob. 2012, 115–16.

Binagbinaga Ini

Paano ang pagkonsagrar sang aton mga kabuhí sa Ginuo nagabulig sa aton nga mangin mas pareho sa Iya?